




# KATILINGBAN

Ang opisyal nga pamantalaan sa Basic Ecclesial Communities (BEC) sa parokya sa Naval

Vol 1, No. 10

website: [www.geocities.com/navaldiocese](http://www.geocities.com/navaldiocese)

Mayo 2005



Most Rev. Filomeno G. Bactol, D.D.

## Mensahe

SANTO PAPA

Niadtong Abril 3, 2005, mihalin ang atong mahal nga Santo Papa Juan Pablo II. Nasubo ang tibuok kalibutan tungod sa iyang pagkawala.

Sa sulod ka 26 ka tuig siya ang atong nahimong giya isip ika-264 nga representante ni Kristo dinhi sa kalibutan. Nahimo siyang suod kanato ug nahimong kapamilya nato tungod sa iyang maunungon nga mga pagtulun-an nga misulti gayud ngadto sa atong mga panginahanglan: kalinaw, kahiusahan, hustisya, pagmahal sa Dios ug kang Maria, kahalangdon sa kinabuhi, ug uban pa.

Apan taliwala sa atong kasubo, anaa usab ang paglaum. Paglaum tungod kay magapadayon man ang Simbahan sa iyang misyon sa pagpanubos pinaagi sa lain nga Santo Papa nga ituboy unya sa mga Cardinales aron magpadayon sa buhat ni Kristo.

Mao nga nagmalipayon ang Simbahang Katoliko sa dihang napili nga bag-ong Santo Papa sa mga Cardinales si Cardinal Joseph Ratzinger sa Germany niadtong Abril 20, 2005. Si Cardinal Ratzinger mipili sa pangalan nga BENEDICTO XVI isip Santo Papa. Dinhi mapasalamaton kita sa Dios tungod kay padayon man nga buhi ang atong Simbahan ug padayon nga magsangyaw sa pagpanubos ni Kristo.

Sa atong mga Gagmay'ng Kasilinganang Simbahan, maghatag unta kini kanato ug bag-ong kadasig sa pagpadayon sa atong mga nasugdan nga gimbuhaton isip kristohanon diha sa atong mga kasilinganan. Maghatag unta kini kanato ug inspirasyon aron ipadayon ang mga buhat sa pagbag-o. Ug niining tanan kanunay kitang mangaliya sa Dios sa iyang mga panalangin nga uban sa atong bag-ong Santo Papa BENEDICTO XVI, makabot nato ang pagbag-o nga atong gihingyap alang sa kahimayaan sa Dios.

Salamat Juan Pablo II! Mabuhi si Benedicto XVI!

Bishop FILOMENO G. BACTOL, D.D.  
ug mga Kaparian sa Naval



## PAMALANDONG SA EBANGHELYO

Mayo 1, 2005: Ika-unom nga Domingo sa Pagkabanhaw  
Basahon: Buhat 8:5-17/1Pedro 3:15-18/Juan.14:15-21

### Tema:

Si Jesus nangayo sa iyang Amahan og laing Paracleto nga maoy magpabilin uban kanato ug magpabuhi kanunay sa atong handumanan ni Jesus. Griyego ang pulong Paracleto nga nagkahulogan nga tigpamaba alang kanato. Ang atong mahigugmaong pagdawat niining Espiritu sa kamatuoran maoy bugtong magtugot kanato sa paghigugma kaniya nga wala pa nato maila pinaagi sa atong mga mata. Ang Espiritu sa kamatuoran mao ang mamugnaong paghandom sa Ginoo nga gihimo sa Simbahan. Kini maoy naghatod sa pagsulod sa misteryo ni Cristo. Busa ang Simbahan misalmot diha sa buhing panag-ambit sa Amahan ug sa Anak. Kining maong Epiritu maoy naglamdag kanato sa paghigugma kang Jesus "diha sa buhat ug kamatuoran ug dili kay sa pulong lamang"(1Juan 3:18). Ang gugma sa usa ka Kristyano alang sa Ginoo dili igo kon kini diha lamang sa pulong. Nagmatuod ang Balaang Kasulatan sa dili maungkag nga panagdugtong tali sa kahibalo ug sa pagkinabuhing matarong. Kon moingon kita nga nakaila kita kang Cristo apan wala kita motuman sa iyang mga kasugoan, namakak kita. Apan "ang nagtuman sa iyang sugo, may hingpit nga paghigugma sa Dios"(1Juan 2:5). Pinaagi sa atong pagkinabuhi sama kang Jesus, mitabok na kita gikan sa kamatayon ngadto sa kinabuhi.

### Pamalandongi kini:

Sa imong pag-ila kang Kristo, imo bang gituman ang iyang mga kasugoan? Hinumdomi nga kon imong gituman ang mga kasugoan ni Cristo, gihigugma mo na sa hingpit ang Dios

**Mayo 8, 2005: Domingo sa Pagsaka sa Langit sa Ginoo**  
**Basahon: Buhat 1:1-11/ Efeso 1:17-23/ Mateo. 28:16-20**

**Tema:**

Ang pagsaka sa langit sa atong Ginoo maoy usa ka dagway sa naghingapin nga misteryo sa Pagkabanhaw. Ang basahon nga gikutlo gikan sa mga Buhat sa Apostoles nagsaysay sa pagbiya ni Jesus sa iyang mga apostoles . Isip natural o labaw sa natural nga panghitabo makapahingangha gayod kini. Apan ang bag-ong Testamento wala magbilin kanato'g mga detalye. Kita usab makayanghag sa langit ug matingala sa Pagsaka sa atong Ginoo ngadto sa langit, apan kining adlaw dili gayod adlaw sa paghalin. Adlaw hinoon kini nga nagbutyag sa saad nga si Jesus mobalik. Nagpahinumtum kini kanato nga si Jesus kanunayng nagauban kanato. Tinuod si Cristo mao ang buhing ulo sa Simbahan nga mao ang iyang lawas. Wala nato mamatikdi ang pagbiya. Atong gisaulog ang usa ka presensiya.

Busa niining adlaw ang ika-lim-an ka adlaw nga milabay human sa Pagkabanhaw maoy usa ka tukma gayod nga panahon sa pagtagamtam sa atong paglaum ug sa atong kahimtang. Makaplagan nato ang kang Kristo nga presensya sa matag takna. Bag-ohon nato ang atong huyhoy nga mga Epiritu sa mga kahinam sa gingharian. Ang kinahiladman natong panlantaw nga makakita sa dakong paglaum , sa mahimayaong kabilin ug sa walay kinutubang gahum ni Kristo: kining tanan nanginahanglan lamang sa mga mata sa pagtuu.

Kinahanglan maghugop kita niining adlaw uban ang abli nga kasingkasing. Wala kita maghugpong diha sa Eyukaristiya aron mapasabot ang Pagsaka sa langit ni pagsag-ulo sa mga punto alang sa

kahubitan niini. Nagtigom kita aron madasig, aron paghalad ug pagdayeg ug aron pagsangyaw sa Nabanhawng Ginoo kinsa wala gayod mobiya kanato.

**Pamalandongi kini:**

Sa imong pagkinabuhi isip Kristohanon, nasinati mo ba nga si Jesus kanunayng nagauban kanimo?

**Mayo 15, 2005: Domingo sa Pentecostes**  
**Basahon: Buhat 2:1-11/ 1Corinto 12: 3-13/Juan 20:19-23**

**Tema:**

“Ayaw ikahibulong nga ako nag-ingon kaninyo nga kinahanglan magpakatawo kamo pag-usab..., apan wala kamo mahibalo diin kini(ang hangin) gikan o asa kini padulong “(Juan 3:7-8). Bisan og si San Lucas misugilon sa pagpadala sa Espiritu Santo sa adlaw sa Pentecostes – ang ika-kalim-an ka adlaw tapos ang Pagkabanhaw sa Ginoo – si San Juan misugilon niini sa gabii sa Pagkabanhaw. Ang matag usa kanila adunay kaugalingong paagi sa paghulagway sa kahimayaan ni Jesus didto sa krus. Alang sa duruha , ang Espiritu Santo mao ang bunga sa kadaugan nga naangkon ni Kristo pinaagi sa iyang kamatayon ug pagkabanhaw. Ang pagkunsad sa Espiritu Santo dili gayod diay mahabulag gikan sa Pasko sa Pagkabanhaw.

Apan nganong kinahanglan madawat sa mga tinun-an ang Espiritu Santo? Sa panlantaw ni San Lucas, kinahangalan nga madawat nila ang Espiritu Santo aron sila makasulti ngadto sa tanan sa tukma nilang pinulongan ug sa ingon masugdan ang misyon sa Simbahan ngadto sa tibuok kalibutan. Dili lahi ang sulti ni San Juan, apan gisulti niya kini sa lain nga



**KATILINGBAN**  
 Ang pagpapal nga nantalan sa Basik Espiritual Community (BEC) sa panahon sa Misyon

**TEAM MINISTRY**

*Team Moderator:* Bishop Filomeno G. Bactol, D.D.

*Team Members:* Fr. Marvyn A. Maceda  
 Fr. Benjamin C. Pantas  
 Fr. Jesus G. Ty  
 Fr. Kenneth Hendricks  
 Fr. Dario Bebillo  
 Fr. Bing Colasito

*Editor:*

Alfredo Paghubasan

*Writers/Researchers:*

Salvador Castro Reymund Icaín  
 Ramises Bongabong Linda Roldan  
 Eudoxia Canonoy Necitas Casado  
 Catalina Machete Gualberto Tonelete

*Encoders:*

Vinna Sabroso Sonia Pitao  
 Josephine Romero

*Circulation Managers:*

Jorge Manco  
 Danilo Jayubo  
 Jonnel Quilaneta  
 Alfredo Olaer

*Business Managers:*

Rizalito V. Curso  
 Conchita Calvez

*Computer Specialist*

Oscar O. Borrinaga

paagi. Ang mga apostoles didto sa lawak sa itaas. Kinandadohan ang tanan nga pultahan kay nahadlok man sila sa mga Judio. Nangahadlok sila ug ang ilang kahadlok makatakod. Nagpamati sila sa matag kasikas sa gawas sa balay. Nangahadlok sila ug nga dakpon. Sa kalit lang mitungha si Jesus sa ilang taliwala: "Ang Kalinaw maanaa kaninyo!" Ang kalinaw maoy labi nilang gikinahanglan niining mabalak-on nga kahimtang. Nahipatik pa sa lawas ni Jesus ang mga timaan sa iyang pagpasakit. Mianha siya, buhi ug mas kusgan kay sa kamatayon. Ang mga pultahan nga kinandadohan wala na mahimong babag sa iyang misyon.

Dili na takna sa kinaugalingong kahadlok. Karon mao na ang panahon sa pagtugot sa Espiritu Santo sa paggun-ob sa tanang babag ug pagdala sa Simbahan ngadto sa unsay gibut-an sa Dios niini.

### **Pamalandongi kini:**

Imo bang gitugotan ang Espiritu Santo sa paggun-ob sa tanang babag sa ingon ikaw mamahimong usa sa mga instrumento alang sa kapadayonan sa misyon sa Simbahan?

**Mayo 22, 2005: Domingo sa Santisima Trinidad**  
**Basahon: Exudos 34:4-9/ 2Corinto 13:11-13/**  
**Juan 3:16-18**

### **Tema:**

Ang labing gamay ug nagalihok nga kahiusahan sa katawhan sa tawhanong kinabuhi wala diha sa usa ka tawo lamang. Matag lalaki ug babaye, bisan unsa kamaut sa espiritu ug sa lawas, nabuhi tungod kay natawo man siya gikan sa panag-abot sa duha ka tawo (babaye ug lalaki). Walay masuso nga molahutay pagpakabuhi kon walay pag-amoma ug pagpakaon, mga buhat sa tawhanong pakiglambigit. Kon buhi man gayod kita . nabuhi kita nga bunga sa usa ka tawhanong katilingban.

Mituo kita nga gimugna kita sumala sa dagway sa Dios. Ang pagtan-aw nato sa atong kaugalingon tataw kaayo ug sa walay lunga anaa gayod sa kinabuhi diha sa katilingban. Tungod niini kinahanglan gayod nga mangita kita diha sa Balaang Kasulatan sa mga sugyot ug mga pagpadayag sa kinabuhi mismo sa Dios, kinabuhi nga alang ug lakip sa uban. Bisan dili gayod kita makaila sa Dios sa iyang pagka

Dios mismo, ang matag ilhanan sa buhat sa Dios dinhi sa atong kalibutan magdala kanato ngadto kaniya, ang Dios nga nakiglambigit kanato.

Ang kabuhatan mismo maoy usa ka pagpadayag sa kaugalingong dagway sa Dios, ang sumpay sa iyang gugma nga lahi ra sa iyang kaugalingon. Ang mapadayonong pagpakighinabi sa Dios ngadto sa kabuhatan miabot ngadto sa kinapungkayan diha ni Jesus, ang Dios nga nakig uban kanato. Kining maong Jesus gidala ngadto sa kahingpitan sa himaya sa Amahan ug ang kahingpitan sa ilang gugma gibubo kanato diha sa gasa sa Espiritu Santo.

Bisan napakyas kita atubangan sa kakuti sa teyolohiya sa nangaging mga siglo nga nangita sa pagsabot sa dili matugkad nga kaladmon sa Dios, mapangahason kitang mihulma og mga hulagway sa dagway sa atong pagtuo pinaagi sa pag-ampo matag adlaw ngadto sa Amahan pinaagi sa Anak ug diha sa Espiritu Santo. Sa pagtimaan nato sa atong kaugalingon sa krus atong gilitok ang ngalan sa Amahan, Anak ug Espiritu Santo. Busa misulod kita ngadto sa kinabuhi uban sa Dios pinaagi sa bunyag. Mosulod kita ngadto sa kahingpitan nianang diosnong katilingban pinaagi sa ganghaan sa kamatayon.

### **Pamalandongi kini:**

Sa dihang ikaw nahimugso misulod ka sa usa ka tawhanong katilingban. Sa dihang gibunyagan ka, misulod ikaw dili lang sa katilingban sa mga matuohon kon dili – sa kinabuhi uban sa Dios : ngadto sa Amahan, pinaagi sa Anakug diha sa Espiritu Santo. Unsa may kahulugan niining maong kamatuoran sa imong kinabuhi?

**Mayo 29, 2005: Solemnidad sa Corpus Christi**  
**Basahon: Deuteronomio 8;2-16/ 1Corinto 10: 16-17/**  
**Juan. 6: 51-58**

### **Tema:**

Ang tawo sa iyang pagka siya lawasnon gayod. Si Jesus ug ang iyang Simbahan adunay tin-aw nga pagsabot niining maong kamatuoran diha sa mga kasaulogan nga gitawag natong mga sakramento. Ang Simbahan mao ang lawas ni Kristo ug ang mga

# BEC BULLETIN

## BEC PAROCEIAL FELLOWSHIP

Riverside, Caraycaray - May 21, 2005  
Agpangi Chapel - May 22, 2005

## BEC CLUSTER FELLOWSHIP

May 7, 2005: Cluster Fellowship  
BEC Ilaya & Smo. Rosario

## 1st Parish-BEC Summer Youth Camp

Date: May 22,23 & 24, 2005

Venue: Agpangi Elementary School

Theme: "We wish to see Jesus"

(Jn.: 12-21)

Registration: P100.00

10 delegates per BEC

Age: 15-49

### WHAT TO BRING:

1. Bible
2. Candle
3. Writing materials
4. Comfortable but decent clothes
5. Medicine for special illness
6. Caps
7. Personal toiletries
8. Small flashlight
9. Utensils and beddings

## *Congratulations!*

### BEC 2nd Anniversary

May 4 - BEC Talustusan

May 11 - BEC Sitio Kawayanan, Talustusan

May 13 - BEC Sitio Bagacay, Haguikhican

May 23 - BEC Upper Anas

May 30 - BEC Sitio Magtaran-an, Talustusan

### *Paalam John Paul II!*

**SALAMAT SA IMONG KABILIN:  
KULTURA SA KINABUHI**

magtutuo mao ang mga bahin niini. Ang tinubdan ug ang kinapungkayan sa tanang kinabuhing simbahanon gituohan nga mao ang kasaulogan sa Eyukaristiya diin ang Lawas ni Cristo, ang mga matuohon, miambit sa ilang pagka-sila.

Niining Domingoha gisaulog nato ang atong pagka kita isip Lawas ni Cristo. Niining Domingoha gibutyag nato ang atong pagtuo nga ang makabuhi ug ang makalimang dugo nga midagayday dinhi kanato mao ang kinabuhi mismo ni Cristo. Niining Domingoha gipunting nato ang atong pagtagad ngadto sa simbolo nga maoy nakapahimong possible sa tanang ubang mga simbolo.

Ang yutan-ong pinulongan sa lawas ug dugo nagpuno sa Balaang Kasulatan. Apan kini ra usab sila ang misangyaw nga ang pagbubo sa dugo gihimo alang sa kaalimahan sa katawhan sa Dios. Ang unod, ang dugo, ang pan ug ang bino maoy mga bunga sa mga paging magun-obon nga naghatod kanila ngadto sa tawhanong talad kan-anan isip pagkaon nga maoy mag-alima sa usa ka banay. Si Cristo mitugot sa iyang kaugalingon sa pagsinati nianang maong mga proseso nga maoy naghatod kaniya ngadto sa talad kan-anan sa tawhanong banay isip pagkaon ug mainom. Niining paagiha nausab ang nangaon ngadto sa ilang gikaon. Nangahimo silang mga "Cristo."

### **Pamalandongi kini:**

1. Tinuod ang atong Ginoo, si Jesucristo, nagpabilin uban kanato diha sa Santos nga Sakramento sa Altar. Ikaw sa imong bahin nagpabilin ba kanunay diha kaniya?
2. Sa imong pagkalawat kaniya, imo bang gipuyan kanunay ang imong pagka "Iaing Cristo" alang sa imong isigkatawo? Sa imong isigkamagtutuo?

*Greetings from:*

**LJC Rice Mill**  
Sitio Lupa, Calumpang  
**AND Groceries**  
Ground Floor, Naval Mall  
*Owned & Managed by:*  
**Bong Bongabong**